

Ouy da, fit-il, & quittant vn plat d'écorce qu'il tenoit entre fes mains, il commence à marquer fur fes doigts les trois perfonnes de la faincte Trinité, & à reciter les premiers rudimens du Chrestien: s'il oublioit quelque chofe, fa femme le luy remettoit en memoire. Veritablement à peine pouuois-ie retenir mes [89] larmes, écrit le Pere, voyant vn homme de quarante ans instruit dans le fond de la Barbarie, parler le langage des enfans de Dieu, & rendre compte de fa Foy & de fon Catechifme, avec l'humilité d'un enfant, & la deuotion d'une grande perfonne. Il mourut enfin le trentiefme de Iuin, apres auoir paffé quelques iours aux trois Riuieres, comme il auoit predit; & fon corps nous fut donné pour l'enterrer, non fans en faire instance en vne affemblée, que ces Barbares firent exprez.

Le feiziefme du mefme mois, deux petits Sauuages furent changez en deux petits Anges. Le fleur Iean Paul vint donner aduis aux Peres de la maladie preffante de l'un des deux: les Peres se transportent aux Cabanes, le font Chrestien, & le nom de Iean Paul luy fut donné par celuy qui auoit donné aduis de la maladie, lequel defira d'estre fon Parrain; il estoit âgé d'un an feulement, fon pere promit qu'il le feroit François, s'il réchappoit. A mefme temps qu'on venoit de baptifer celuy-cy, Robert Hache; c'est le nom d'un ieune homme qui demouroit avec nos Peres aux trois Riuieres, [90] vint crier qu'on se dépeschaft de venir baptifer vn enfant de huict iours qui estoit aux abbois. Le Pere Buteux y accourt, & fur la remonftrance que fit à la mere la femme du Capitanal, obtint permiffion de le baptifer, de le nommer Ignace, & de l'enterrer bien toft apres.